

R. P.

CLAVDII

AQVAVIVÆ

SOCIETATIS IESV

PRÆPOSITI GENERALIS

INSTRVCTIO

Pro Superioribus

Ad augendum conservandumque spiritum in Societate.




ANTVERPIÆ,


Apud IOANNEM MEYRSIVM.

M. DC. XXXV.

SVPERIORVM PERMISSV.



A D
S V P E R I O R E S
S O C I E T A T I S.

 *NI sunt propè septem, cum missa sunt ad Prouincias sex Capita, quibus præcipua quædam Monita, quasi fontes spiritualis nostræ administrationis continebantur, ad conseruandum augendumque spiritum in Societate à R. P. N. Generali excogitata, & cum Patribus Assistentibus communicata: quæ posthac Superiores lætarent studiosè, & ad faciliorem commodioremque gubernandi rationem præmanibus haberent. Quin etiam anno antè eâ de re seriò moniti Prouinciales, qui omnino efficerent, vt in suis Prouinciis eorum copia Superioribus suppeditaret,*

A 2 taret,

taret, essetque exemplar penes unum-
quemque. Verum cum experiëntiâ com-
pertum sit, hæc à multis ignorari, ne-
dum à singulis legi atque versari, eo-
rumque inopiâ in Prouinciis plerumque
laborari, quâ in exscribendo labore, quâ
sensu quodam, quo, nescio quonam pa-
cto, iis peruoluendis legendisque magis
oblectamur ac ducimur, quæ à typis lu-
cem accipiunt, quàm quæ in membranis
scripta delitefcunt; ob id è re Societatis
fore, ac propè necessarium visum est, si
ea typis excusa ederentur: spe factâ, il-
lud omnino commodi ex hac editione
futurum, ut si suppeditante copiâ per-
uolutari hæc incipiant, ac Superiorum
manibus teri, is quem tantoperè expeti-
mus, & ad quem tot conditæ leges, &
hæc ipsa capita diriguntur, fructus in
diem capiatur uberior (hoc est ea quæ
iubentur, exequi non remisè) & tantus

*actam utilis labor non omnino irritus
reddatur. Quod equidem ut & futu-
rum planè confido, si ea diligenter, ut
par est, Superiores meditando commen-
tandoque perlegerint; sic pro certo habeo
facturos alacriter, cùm P. Nostri Vig-
lantiam propè singularem experti, qui
totus est in elaborando perficiendoque
spiritu in Societate, intelligent ex huius
aurei libelli commentatione non parum
emolumenti in subditos redundaturum.
Romæ Kalendis Ianuariis. 1604.*

Mandato R. P. N. Generalis.

BERNARDVS de ANGELIS
Secretarius.

INDEX

CAPITV M.

D	<i>E instruendis , formandisque Superioribus.</i>	
	Cap.1.	pag.7.
	<i>Circa executionem. Cap.2.</i>	20
	<i>De spiritu & Oratione. Cap.3.</i>	24
	<i>De Obedientiâ. Cap.4.</i>	29
	<i>De Castitate. Cap.5.</i>	36
	<i>De difficultate in gradibus acceptandis. Cap.6.</i>	42

De

De instruendis formandisque
Superioribus.

CAPVT I.

QVANDO QUIDEM post varias ordinatio- Cum post multas & varias ordina-
tiones edi-
tas optatus
fructus haud
extiterit.
nes, post crebras Superiorum ad officij
sui curam excitationes, post visitationes deni-
que, tum solemnes Prouincialium, tum extra
ordinem institutas Visitatorum, nondum tamē
is fructus, nec spiritus incrementum aut feruor
elucet, quem omnes optamus, & quem ego vt
omnibus modis procurē priuato ac præcipuo
muneris mei vinculo admoneor; in hanc cum
Patribus Assistentibus meis deliberationem
veni, vt ab Vrbe per aliquot hebdomadas se-
cedentes, animum intento studio ad contem-
plandas detrimentorum nostrorum radices &
remedia referremus. Re autē multis precibus
& sacrificiis Deo Domino diligenter com-
mendatā, manifestò deprehendimus, reliquos Radix, ex-
ecutionis de-
fectus.
omnes defectus ab vno executionis defectu
tamquā ex fonte manare: quia si ordinatio-
nes diuersis temporibus editæ, imò solæ Regu-
læ ipsæ si obseruarentur, vix admodū esset,
quod in studio perfectionis, religiosæque dis-
ciplinæ desideraretur. Et quoniam hæc ipsa Vir execu-
tionis maxi-
me ab opti-
mis Superi-
oribus pen-
det.
executio maximā ex parte pendet à Superiori-
bus, propterea primum ac peculiare studium
in eo ponendum esse censuimus, vt accuratè

instruantur formenturque Superiores. Frustrâ siquidem libri Regulis, Ordinationibus, ac Visitationibus implentur; si desint animata instrumenta, quæ spiritum subministrent, & viuidam illarum praxim exerceant. In hunc ergo finem operæ pretium ante omnia visum est de hoc capite pauca, quæ sequuntur, statuere, vt in posterum obseruentur.

Prouincialis, dum Prouinciæ suæ loca visitat, in singulis Domibus & Collegiis, cum Superiore ac Ministro Consultores etiam, eosque, qui aliàs gubernarunt, conuocet: coramque cum illis Rectorum & aliorum Subordinatorum Regulas; Ordinationes item, Instructionesq; typis excusas legat. Vbi præter communem earum intelligentiam, declarationem, propria etiam cuiusque praxis, & quibus in eâ modis errari possit, sedulò pertractetur; ita vt practicæ quædam fiant conferentiæ de viâ & modo rectè gubernandi. Legant præterea, sed singuli priuatim, S. Bonauenturæ libellum de Sexualis; tum deinde in medium adferant, si quid fortè inter legendum incidit, quod proponant. Neque abs re forsan fuerit, si semel in eo congressu reciteretur etiam epistola nostra ad Superiores. Denique permagni futurum est adiumenti, si ad rem nostram & institutum adaptemus, quod S. Basilius in Reg. fus. disput. c. 54. suadet, vt celebrentur de iis rebus conferentiæ, in quibus labi procliuè est; & quam quisque rationem in quorundam morbis, quo-

A Prouinciali in visitatione quæ legenda & declaranda.

Quid cuique priuatim legendum.

Conferentia habenda.

quorum difficilior ad tractandum natura & mores erant, ut illis mederetur securus sit: quid denique in hoc illóve casu fieri oporteret, prolati in medium variis interrogatiunculis, & peculiaribus circumstantiis. Quam ad rem conferent iuuabuntque, ut spero, aliquot Industriæ, quas ad spiritualium infirmitatum curationem appositas, ut eorum qui gubernare incipiunt, instructioni, aliorum etiam memoriæ *Proderunt industria iam edita.* seruiant, propediem missuros nos confidimus; cum adeò discrepans à corporum medicinâ, tantoque quàm illa, difficilior sit hæc curatio, propter causas, quas Gregorius Nazianzenus Apologetico suo complexus est, & Gregorius alter Papa præclarè item explicat pluribus in locis. At Superiori priuatim postea indicabit Prouincialis, si quid fortasse in hoc illóve curando peccarit, & quomodò in posterum se gerere debeat ne aberret.

Quod ipsum cum ad Domus cuiuspiam *De quibus circa hæc conferentiam Generalis mouendus.* visitationem accesserit, cum eius Superiore & Consultoribus præstabit, aliisque de quibus dictum est. De singulis autem, re perfectâ, suis ad nos litteris perscribet; quos nimirum conuocarit, & in hunc modum instituerit: quemadmodum successerint conferentiæ; quantum iudicij vnusquisque, & quantum in se spiritus ostendat; scribebuntque de iisdem etiam rebus singuli, tum ipsius Prouincialis, tum vniuscuiusque Collegij Consultores.

Nunc verò, ut ad ipsum Superiorem officium *Superiorum errata.*

veniamus, ostendamusque quibus in rebus errare, ac muneri suo deesse possint; doceri debent, errores defectusque ex eo nasci, quod subditorum suorum morbos vel ignorent, vel negligent, vel foveant interdum ipsi, vel etiam augeant, vel eos denique exasperent & grauius exulcerent. Ad hæc enim capita quinque omnes huius spiritualis medicinæ defectus reuocari videntur.

*Ignorant
subditorum
morbos.*

I Et ignorant quidem, vel quod ad actus ipsos extrinsecos, eò quod fidos vigilantesque syndicos non adhibent, non percontantur à quibus & quando sciscitandum est. Ministrum nec habent idoneum, nec fingere ipsi aut formare norunt. Filiorum denique suorum ægritudines paterno affectu ac sollicitudine non obseruant. Intrinsecus autè, quia aut conscientix rationem, quo par est modo, non exigunt; aut subditi ipsi minùs eis confidentes, aperire se penitus non audent; ita fit vt interdum durior quædam agendi ratio, & parum affabilis homines alienet; interdum opinio, quam de Superioribus suis quasi fucò & artificio vtantur, animo conceperunt: quo quidem certior nulla pestis esse potest, cùm accidere nihil possit, quod animos ab amore ac fiducia sic auocet; nihil, quod subditorum mentes magis excitet acuatque vt fucum & ipsi quærant, & res suas rectas atque occultas esse velint. Vnde sublatà mox integrà ac sincerà sui ipsius erga Superiorem manifestatione, quam Regulæ nostræ

nostræ & Sancti Patres tantoperè inculcant, occluditur sine vllâ spe remedij via omnis & ratio totius auxiliij spiritualis.

2 Negligunt, atque in deteriora labi sinunt *Negligunt.* multis modis: seu quia paternè ac sincerè non monent; seu quia laqueos & pericula non indicant, quæ subditi in suis illis defectibus non vident; defectuumque ipsorum radices ac fontes non patefaciunt. Idipsum prætereà faciunt cum vel pœnitentias non imponunt, culpafque & errata non corrigunt, quod quidem pertinet ad disciplinam; vel damna non prospiciunt, nec illis occurrunt vel occasiones amputando, vel habenas reuocando, quod spectat ad custodiam. Hæc siquidem duplex illa est cura, quam subditis præstari à Superioribus debere S. Bernardus affirmat.

3 Fouent aluntque dissimulando, & con- *Fouent dis-*
niuendo, quasi non videant; relaxando, ac libe- *simulando.*
riùs interpretando, dispensando sine causâ legitimâ, vbi nec maius bonum cernitur, nec maior Religionis, subditivæ utilitas, quinimò vbi & bonum minus est, & maius Religionis, subditi que ipsius detrimentum. Quæ quidem laxitas & licentia plurimum haud dubiè damni affert, longèque ab illâ summâ curâ & sollicitudine distat, quâ filij Dei ad perfectionis statum ab eo vocati, educari tractari que debent. Ex *Serm. de vitâ spirit. num. 36.*
quo & illa S. Ephræm præclara sententia omni certè memoriâ dignissima. *Eum, inquit, qui ceteris præest, peritissimum esse conuenit, & ad consulendum*

dum salutis Subditorum vigilantissimum; utq, singulorum obseruet incessum, motum, gestum ac habitum, adhibet etiam debitam earum rerum correctionem, qua minus conueniunt, ut ad optimum ea statum formamq, reducantur. Magistri enim non solum elementorum figuras Discipulis ostendunt, sed & minima quaque puncta, distinctionesq, proponunt. Sic igitur oportet Prælatus nihil quantumuis minimum, quod ad salutem pertineat, omittere, quin id fratribus proponat. Huc usque illius verba.

Augent placendi studio.

4 Augent porrò humano quodam metu, dum placendi studio errata vel leuiter tractant, vel penitus etiam tegunt & dissimulant. Idemque accidit, cum remedia opportuno tempore non admovent, quæ postea scilicet, cum morbus inualuit, alieno tempore & parum consideratè adhibere student; quando & lenia, quæ iuuare suo tempore potuissent, inutilia iam facta sunt; & acriora sine graui incommodo applicari nequeunt.

Exasperant acriori correctione.

5 Exasperant atque exacerbant, cum in ipsâ correctione stomachum potius quemdam, animique perturbationem, quam sincerum charitatis affectum, commiserationemque præferunt: cum acrioribus verbis rem exaggerant, iisque nonnumquam etiam mordacibus, & contumeliosis: cum acerbiora denique medicamenta ingerunt, quam aut morbi vis requirat, aut ægri conditio & natura patiatur. Quo ex fonte mala plurima dimanant. Ideoque S. Gregorius ad Urbicum

Ab-

Abbatem scribens, exintemperato & incondito eius agendi modo, dissolutam Monasterij regulam fuisse dicit. *Quod ex nullâ, inquit, aliâ re evenire valuit, nisi quia tua dilectio in regimine suo inordinata est; nec cum gravitate aliquid valet disponere, sed modò studet peccantibus leniter blandiri, modò inordinatè & extra modum nimium irasci.*

Radices horum malorum in Superioribus hæ videntur esse.

IGNORANTIA, seu obliuio muneris & par-
 tium, quas ab eis exigit officium: quia minime cogitant se medicos, pastores & patres esse: Ignorantia Superioris & obliuio muneris sui. quod non debeant nec verò possint relaxare aut dispensare dissipando, sed in iis tantummodò, in quibus constat talem illius, qui regulas & Ordinationes condidit, mentem fuisse. Quodque in omnibus rebus primas tenere oporteat non arbitrium sensumque gubernantis, sed exploratum ac certum iudicium, ad maiorem Dei gloriam fore id fieri, de quo agitur, quàm omitti. Non recordantur quod S. Basilus docet, Infirmorum onera & infirmitates portare, ita demum intelligi, cum in iis curandis omnis fuerit adhibita diligentia. Non recogitant se patres esse, & patres non corporum, sed animarum; quique illius locum teneant, qui pater spirituum, ut Apostolus loquitur, ad id semper nos dirigit, quod utile est

est ad recipiendam sanctificationē eius. Vnde cauendum ipsis est diligenter, ne gubernationem suam politico sensu & ingenio dirigant, neque humanis respectibus priuata potius cōmoda finesque, quā diuinā gloriam, & subditorum perfectionem (quantumuis ipsi excusare se apud se, & malum hoc tegere studeant) spectantibus sinant se duci. Obliuiscuntur denique se non vnius cuiuspiam aut duorum Superiores esse, sed omnium, qui ipsorum curæ fideique commissi sunt. Quo fit vt in iis cernantur interdum priuatæ in aliquos amicitia ac necessitudines, quæ offensionem in aliis subditis, & diffidentiam, æmulationemque pariant; tum suspiciones etiam non prorsus vanas, nec inanes, ne affectu aliquo infuscatæ, minusque sinceræ sint informationes, quæ ad mediatos Superiores transmittuntur.

*Exigua cura
in internis
cultus.*

2 Negligentia, seu exigua cura rerum internarum: quia Superior, si curam spiritus, deuotionis, & intimæ cum Deo coniunctionis, studiosè diligenterque complecteretur; rectū proculdubio erga se, aliosque in omnibus ordinem teneret. Ideò enim hoc studium Constitutiones nostræ, tamquā primarium ac potissimum in Superioribus requirunt. Et S. Bonauentura hanc veluti sextam, postremamque alam faciens, meritò dixit, sine eā reliquas perfici non posse; cū per illam zelus iustitiæ accendatur, pietas compassionis erga fratres infundatur, patientia roboretur, exemplum bo-

P. 4. cap. 10.
§. 5. & p. 9.
c. 2. §. 1.

bonum conditur, discretio denique clarificetur. Quamobrem necesse in primis videtur, ut & nos omnes in Superioribus deligendis in hoc Dei donum oculos intendamus; & qui ad id munus vocantur, donum hoc à Deo enixè petant, omnique studio prosequantur. Sed quàm necessaria sit iis, qui præsunt, hæc conditio, præclara extant & luculenta S. Basilij, & S. Chrysostomi, utriusque Gregorij, & S. Bernardi, omniumque, ut semel dicam, Sanctorum testimonia.

3 Omittere, aut perfunctoriè & sine attentione obire præscriptam horam considerationis. Nec enim dubium esse potest, quin Superior positâ obligationis suæ notitiâ, & bonâ ac rectâ cuiusque voluntate, communisque Societatis boni, & subditorum auxilij desiderio, si vacuo atque attento animo ea considerare incipiat, quæ in eâ Ordinatione breuiter indicantur; excitari se necessariò sentiat, impelli- que ad executionem. Veremurque non parum, ne ex huius capitis defectu complures alij suboriantur, qui per Collegia in dies conspiciuntur, & post multa monita, Visitationes, ac litteras Prouincialium, eodem tamen in statu sine remedio semper hærent. Propterea eodem ipso, quo tum temporis vsum sumus, ac maiore etiam studio & contentione ordinationis illius curam obseruationemque commendamus.

Hora considerationis perfunctoriè obitur.

4 Est & alia malorum radix longè perniciosiusil-

In rebus externis occupatio.

ciosissima , eoque periculosior , quò minùs vulgò noxia censeri solet, rerum scilicet exter-
narum occupatio , in quam Superiores ferri
ut plurimum, ac variis nominibus supra mo-
dum effundi solent. Sunt enim qui naturæ
quadam propensione ad distractiones proni,
non solum oblatas occasiones cupidè arri-
piunt, ut operam suam impendant , sed eas
ipsimet ultro quærunt, & nasci quodammo-
dò ac succrescere faciunt. Alij ob rei fami-
liaris inopiam , sic illis se totos tradunt , ut
summa & præcipua subditorum cura in
hoc vno sira esse videatur. Alij per speciem
proximos lucrificandi , multis sese visitatio-
nibus implicant, iisquæ non modò non neces-
sariis, sed parum etiam utilibus ; atque in his
ita versantur , ut à sæcularium moribus pa-
rum abscedant ; adeò ut si rationes subduce-
re velint , reperiant vespèri , cùm serò do-
mum redeunt , se perexiguo fructu horas
complures, non leui damno suorum commo-
dis & consolationi, disciplinæque domesticæ
utilitati subtractas, consumplisse. Alij piâ ma-
gis specie proximos per consueta ministeria
iuuandi, erga deuotulas aliquot operam suam
ponentes , plus inde occupationis referunt,
quàm fructus ; ut necessarium planè sit re-
medium huic malo efficax adhiberi , cùm
inordinatæ huiusmodi occupationes non so-
lùm tempus eripiant , sed mentem quoque
obscurant, & cor ipsum indurent : quò fit, ut
tacito

tacito sensu post aliquod temporis spatium homo nec opinans immutetur, longeque aliter affectum se deprehendat, quàm suspicabatur. Hinc illa S. Gregorij homiliâ 17. memorabilis & assiduè expendenda sententia: *Curis*, inquit, *secularibus intenti, tantò insensibiliores intus efficiuntur, quantò ad ea, quæ foris sunt, studiosiores videmur.* *Vsu quippe curæ terrenæ à celesti desiderio obdurefcit animus: & dum ipso suo usu durus efficitur per actionem sæculi, ad ea emolliri non valet, quæ pertinent ad caritatem Dei.* Vnde benè Sancta Ecclesia de membris suis infirmantibus dicit: *Posuerunt me custodem in vineis: vineam meam non custodiui.* *Vineæ quippe nostræ actiones sunt, quas usu quotidiani laboris excolimus. Sed custodes in vineis positi, nostram vineam minimè custodimus, quia dum extraneis actionibus implicamur, ministerium actionis nostræ negligimus.* Neque verò hæc eò dicuntur, quòd Superior aut necessitati rerum temporalium prospicere non debeat, aut illi à ministeriis penitus abstinendum sit: sed quò & illa ordine, modo, auxiliisque consentaneis procuret (quæ de re appositè S. Bonaventura in Alâ quintâ discretionis, in tertio gemmarum ordine) & hæc ita tractet, vt tantum ex illis sibi sumens, quantum ea quæ officij propria sunt, minimè impediat; quidquid in eis temporis ponere potest, id in utilioribus rebus ponat, quæ subditus simul exemplo sint tum humilitatis tum celi animarum. Quod scilicet tum vsuuenit

Cant. 1.6

cùm vilioribus & egentioribus personis operam nauat, vbi constet maiorem inesse laborem, & plus meriti, quàm honorificæ vel speciosæ occupationis.

*Ignoratio
spiritualiter
medendi.*

5 Quinta est, artem nescire modumque curandi spirituales infirmitates: quia cùm præposterè initur curatio, sperari salus vix potest. Et quoniam ex hoc fonte plurima incommoda nasci solent, ob eam rem statuta sunt, quæ de hoc capite suprà diximus, quæ quidem Prouincialibus vnice commendamus.

*Impatientia
in perferen-
do.*

6 Sexta est impatientia in perferendis laboribus diurnæ curationis: quia tametsi malum sæpè cognoscant, & medicinam ei facere incipiant; attamen quia curatio hæc non vnius aut alterius est hebdomadis, sed tempus longiusculum requirit, & infirmus reluctatur, paritque fastidium, defessi tandem fractique succumbunt. Ex quo sequitur, vt aut malum leuiter tantùm obducant, contentique sint æternâ quadam specie, sine effectu veræ ac solidæ sanitatis; aut tædio certè victi, cum Prouinciali importuniùs agant, vt subditus ille aliò amandetur. Quod quidem longè mali plus habet, quàm primâ forsitan fronte videatur. Translato etenim huc illucque infirmo, cum eius curam ex animo nullus amplectatur, mutanturque in dies & medicus, & ratio curationis, fit vt æger ipse propemodùm desperet, & ab omnibus Superioribus auersus, in maxi-

mas

mas angustias miser redigatur : eò quòd ab-
iecto iam pristino erga Societatem affectu, ad
eum modum vivere nequit ; & Religione vi-
cissim adeò grauem omnibus illum , vt Supe-
rioreum nullus habere velit , ac propè insa-
nabilem reputante , quò res tandem emer-
sura sit, facile est iudicare. Quapropter necesse est,
vt magnâ cum caritate & longanimitate, illius
quisque infirmi curam gerat , quem Dominus
eius fidei commisit : statuâtque se in eo rem
diuinæ ipsius Maiestati gratissimam facere (à
quâ proinde sperare , ac suis & aliorum preci-
bus in hac curationis sollicitudine implorare
opem debet , mercedemque amplissimam ex-
pectare) nisi fortè huiusmodi aliquando
circumstantiæ concurrant , ve ex parte Supe-
rioris immediati , ve ex loci , occupationisve,
aut ipsius etiam infirmi conditione , vt dis-
cretæ Promouciali suadeat , illum commo-
dius & fructuosius alio potius in loco curan-
dum esse.

7 Septima & postrema, quòd non det ope- *Defectus boni*
ran Superior , vt ipse alius omnium virtutum *empli.*
exemplo præluceat , singularitatem declinan-
do, & modum omnem proccedendi, qui suspi-
cium præbere possit, ipsum imperio & gu-
bernatione delectari : specimen dando humi-
litate, integritate, paupertatis, caritatis, iudicii,
in omni quæ laborum, & quod ad rem manum

facit, obedientiæ erga suos Superiores, non voluntatis solum, verum etiam iudicij, optando ab eis dirigi; monitaque illorum ac reprehensiones humiliter, & cum ædificatione, quando vsuuenit, suscipiendo; nec contrà ægrè ferendo, curiosiusve, quis detulerit, obseruârit, scripserit, inquirendo. Et quia quod de exemplo dictum est, summi prorsus est momenti, multa utique hoc loco dicenda forent: sed nobis satis fuerit Sancti Gregorij verbis 24. Moral. concludere. *Neceſſe eſt, ut is, qui præeſt, quæ exempla ſubditis præbeat, ſolerte attendat: & tantis ſe ſciat viuere, quantis præeſt. Subditque: Non debet hominum ducatum ſuſcipere, qui neſcit homines viuendo præire: ne qui ad hoc eligitur, ut aliorum culpas corrigat; quod reſecare debeat, ipſe committat. Hin inde ergo ſe qui præſunt circumſpiciant, ut ſibi & ſubditis viuant, ut bonum quod faciunt, & intra ſinum mentis abſcondant, & tamen ex eo ad proſectum ſequentium, exempla rectæ operationis impertiant.*

Circa executionem.

C A P V T II.

*In executionem incum-
bendum.*

ET quoniam omnis, ut dictum est, conatus, non in uouis ordinationibus condendis, sed in eorum quas habemus, executione adhibendus est, necesse omnino fuerit in hanc

hanc præ omnibus seriò ac diligèter incumbi. Prorsus enim docet experientia, & incommoda, quæ inde nascuntur, liquidò demonstrant; plus in hoc genere desiderari, quàm aut bona tot Dei famulorum voluntas, aut prompta & simplex obedientia polliceri debere videantur. Id porrò ex trium capitum aliquo nasci solet. Primum quòd ignorentur interdum à Rectoribus nonnullæ Ordinationes, aut earum certè minimè recordentur. Qui enim eas nesciunt, aut memoriâ non retinent, nec in promptu habent, quod præscriptum est; eos certum est, Ordinationum praxim exigere non posse. Satis autem constat, aliquos Superiores & Consultores suam nonnumquàm ignorationem prodere, cùm audiunt admonenturque extare de hac aut illâ re talem Ordinationem.

*Executionis
defectus ex
ignorantiâ
ordinationũ.*

2. Alterum est, nimia quædam facilitas & indulgentia, quando, ut antè dictum est, parui interesse putant, atque in manu suâ esse arbitrantur, ut dispensent, & habenas laxent prout volunt; non aliter quàm si quidquid conscio Rectore fit, idem continuo rectè ac religiosè fieri credendum sit. Quâ nimium opinione nulla Religioni perniciosior esse potest: quia non Regula tantum, tot lacrymis & precibus à S. P. N. IGSRATIO exaratas, sed Ordinationes etiam ac decreta, tot item consultationibus precibusque expressa, per illudere sibi deberet

Nimia facilitas & indulgentia.

maioris esse momenti, grauioribusque malis declinandis cōdita fuisse, quàm ut ab vnoquoque Rectore concipi & comprehendere statim possit. Quòd si nondum id assequi penitusque cognoscere potuerunt, hæc saltem opinio ac persuasio, quòd in illis maius quoddam bonum insit, quàm ipsimet intelligant; reuerentiam illis atque auctoritatem conciliare deberet, ne tam leuiter & pro arbitrato, perinde ac si res prorsus indifferentes essent, ab eis tractarentur. Hinc enim illa (quam S. Bonaventura describit) Religionum confusio, *quia pueriles mentes sibi met dimittuntur sine frano retrahente à noxiis, & sine virgâ ad salubria compellente, aut ex negligentia seniorum, aut ex nociuâ condescensione. Sicut imprudens medicus, &c.*

3. Tertium est difficultas, quæ à subditis obiicitur. Superiores enim, dum eorum in obediendo repugnantiam cernunt, & quòd post crebra monita ac pœnitentias, nondum ut aliquid facerent inflecti potuerint; partim ut altercationes deuitent, partim quòd emendationis spem nullam concipiant, nonnumquam etiam humano quodam respectu ducti, vrgere amplius non audent. Res summi plane periculi, errorisque plena: quoniam si ei, qui obliquas scribendo lineas ducat, regulam applicat non auidet, perspicuum est, qualia tandè eius scripta futura sint. At in hoc genere tantò grauius est periculum, quantò certius est ea li-
centia

De Instit.
Nouit. p. 2.
c. 1.

centiâ libertateque agendi vt velis, habitum ingenerari, per quem difficilius in dies euadat, ex regulâ alienoque arbitrio vitam ducere.

Remedia.

1 **C**VRENT Prouinciales, vt Superiores *Ordinationis frequens lectio, & hora considerationis.*
 locales omnino habeant & legant Ordinationes, horamque considerationis obseruent quàm accuratissimè.

2 Cùm visitant, de hoc capite nominatim *In visitatione de executione inquirant & Generalem doceant.*
 inquirant, & ad nos singulis ex locis referant, vbi & quâ in re peccetur: singulis item in locis coram Rectore, eiusque Consultoribus Regulas & Ordinationes examinent, obseruando in quibus, & quas ob causas erretur; & quenam præscripta sint remedia.

3 Admonitor Prouincialis, qui eiusdem *Prouincialis admonitor id maxime curet.*
 socius, vt plurimum, esse solet, hoc ipsum peculiari curâ inspiciat; illumque de eadem re commonefaciat, atque ad nos quoque quid fiat aus prætermittatur in hac parte, perscribat. Quod etiam iuxta instructionem suam præstabunt vniuscuiusque Domus & Collegij Consultores.

4 Faciant Prouinciales, & Superiores *Remissionis damna.*
 intelligant, sibi que omnino persuadeant, cum qui gubernat, solâ ipsâ remissione plurimum unctæ. Itaque non de iis solum, qui ea fa-

ciant, quæ facere non debent, sed de his quoque, qui quod facere debent, prætermittunt, dici non posse eos talentum habere gubernandi. Vnde necessarium erit, vt Prouinciales maturè de iis nos moneant, qui in hoc genere delinquant, vt mutari scilicet possint, & alij substitui, qui diligentius inuigilent: quandoquidem Deo rationem rectè reddere de malâ eorum locorum gubernatione non poterimus, quæ ab huiusmodi Superioribus ex sanctâ ipsius voluntate non gubernantur.

De spiritu & oratione.

C A P V T III.

*Potissima
cura in ora-
tione.*

EX operibus ipsis imperfectionibusque quotidianis facilè apparet, orationis, internatumque rerum studium haudquaquam in omnibus tantum esse, quantum esse res ipsa postulare. Idemque nobis contingit, quod vasculo cuiquam accideret, quod per angustioris aditu modicam aquam accipiens, complures rimas haberet, quibus illa sensim efflueret. Quare præcipuam in hoc studio curam poni necesse est, quoniam & disciplina, & ministeria, atque, vt vno verbo dicam, omnia nostra rectè habebunt, si spiritu ambulemus. Ad promouendum autem, quoad conferre hu-

*Promouenda
orationis
media.*

mana

mana cooperatio potest, augendumque sanctum hoc studium, opportuna in primis hæc pauca videbantur.

1 Primùm, vt in exhortationibus seriis, *Exhortationibus accendendi.*
& cor ipsum petentibus, ad id crebrò incitentur.

2 Excitentur identidem Præfecti rerum spiritualium. *Præfecti excitentur.*

3 Frequententur exercitia spiritualia, ita vt reuerà intelligant omnes quantoperè illis indigeant, quicumque conditorem suum agnoscere, & in eius amorem ardentius inflammari desiderant. Et verò multis verbis minimè opus est ad persuadendum, vt fenestram manè aperiat, qui lucem videre velit. *Frequens usus exercitiorum spiritualium.*

4 Exigatur primo quoque tempore per Superiorem, aut certè per rerum spiritualium Præfectum, ab omnibus domesticis ratio, quam orando tenent, tum circa materiam, tum circa modum ipsum: in eoque instruantur, vt cum fructu peragatur. *Exigenda ratio modi in orando.*

5 Fiant per aliquot dies solidæ circa examinandæ conscientiæ rationem exhortationes. Et quia non omnes forsan Rectores ex se habent, vnde hoc præstare pro dignitate possint, operæ pretium fuerit, si Prouincialis, quibus locis opus esse iudicauerit, nonnulla ad eos capita maturè cogitata & expensa transmittat. Coniuncturque vt singuli hebdomadis vnius aut alterius spatio, in hanc examinationis

curam diligenter incumbant, suos in eo defectus observando, de impediementis cum Præfecto conferendo, rationesque exquirendo, quibus vtiliter fructuoseque id facere possint. Commendetur impensè usus examinis particularis, ut si minùs diuerso, communi saltè utriusque examinis tempore peculiari curâ exerceatur: in eumque finem publica & communis sit hæc animi contentio; ita ut Domi sciant omnes, in eo nunc loco ab omnibus operam dari, ut sese in examinis usu & studio perficiant. Sic enim fiet, ut non feruor solùm maior excitetur, sed maior etiam gratia & influxus per communes omnium preces à Domino impetretur.

*Legantur
litteræ de re-
nouatione
spiritus.
Extraordi-
narium spa-
tium dent
lectioni.*

6 Legatur attentè & cum meditatione aliquâ epistola nostra de spiritus renouatione.

7 Sumant singuli ad duarum hebdomadum spatium, tempus aliquod extraordinarium, quod lectioni spirituali tribuant, pro suâ cuiusque necessitate legendo ac meditando. in primisque de causis damnisque tepiditatis, de motibus ad Deo perfectè seruiendum impellentibus, de iis demum, quæ sibi impedimento esse sentiunt: caput aliquod Gersonis, seu de imitatione Christi, S. Bonauenturæ, S. Bernardi, & similium, prout vel superiorum temporum experientia, vel eius qui dirigat, consiliū edocebit.

*Quærendum
de causis di-
strationis.*

8 Interrogent vnumquemque Superiores de

de causis suarum distractionum, occasioneſque fortiter ac intrepidè submoucant: gratum ſiquidem id illi eſſe debet, qui cùm propoſitum habeat ad perfectionem contendere, obices omnes remoueri ex animo deſiderat. Et Superior ipſe regulam ſuam conſtitutionemque ſeruet, quam enixè ſtudioſeque commen- damus.

9 Præmiſſâ efficaci exhortatione de fructi- *Exhortatio-
nes de ſilen-
tio.*
bus ſilentij, de damnis & periculis nimix lo-
quacitatis, de facilitate ſeruandi in Societate
ſilentij; ſeriò admoneantur omnes, vt Regu-
lam ſilentij minimè obſcuram illam, ſatisque
manifeſtam, obſeruent: imponanturque trans-
gredientibus pœnitentiæ. Nec alienum fue-
rit, ſi iis qui loquendo modum excedunt, hanc
pœnam iniunxerint, vt à communi recreatio-
ne abſtineant; & tempus illud ab aliis ſegre-
gati ponant in conſiderandâ obligatione, at-
que vtilitate ſilentij; aut alias item vſitatas pœ-
nitentias. Denique aduigilent Superiores, vt
vigeat prorſus huius Regulæ diſciplina, quæ
multis in locis plus æquo, nec ſine graui acturâ,
negligitur. Verendum enim nobis eſt, ne
qui plurimum colloqui & tractare inter nos,
& cum proximis ſolemus, minùs abſurdum
paulatim iudicemus, frangi apud nos violari-
que ſilentium. Ita vt neglecto eius, tanquam
rei, quæ minimùm offendat, ſtudio, iaceat
omnino regula, maneatque in ſolis libris
exara-

exarata. Quòd verò seruādi silentij permagna sit in Societate facultas, ei faciliè constabit, qui per tempora & occupationes orationum, examinum, studiorum, disputationum, ministeriorumque cum proximo decurrens, animaduertet, excepto vtriusque recreationis tempore, quod silentij tempus non est, perexiguum esse spatium quod restat. Quò grauiore utique censurâ & animaduersione digna, maiorque linguæ incontinentia ea videtur, quæ post tot occupationes, & post stata recreationum interualla, vel modicum abstinere nequit à verbis non necessariis.

*Recreationes
religiosè
obeantur.*

10 Adhibeatur peculiaris diligentia, ut recreationes religiosè traducantur, quòd eo tempore, nisi rectè transigatur, refrigescat spiritus, plurimumque distrahatur. Aduigiletur, ut non solùm exterminentur obmurmurationes; sed explodantur etiam rerum nouarum narrationes, libertasque & sæcularitas indecora. Designentur idonei syndici, submittanturque secretò boni aliqui ac spirituales, qui sermones sanctos, & religiosæ recreationi conuenientes inducant.

De Obedientiâ.

CAPUT IV.

QVARTVM, in quo perfici summo studio debemus, est obedientia. Cuius etsi *In obedientiâ perfici debemus.* (quæ diuina est misericordia) non exigua virtus cernitur in Societate, cuius subditi tantâ cum alacritate tot periculis nauigationum, tantiſque locorum difficultatibus se committunt; & in missionibus, confessionibus, lectionibus, aliisque Instituti nostri exercitiis, magno animi ardore & contentione versantur; tamen cum ea sit huius virtutis dignitas ac momentum, ut in eius absolutâ perfectione præstantissimos B. P. Noster esse voluerit homines Societatis, inefficari non possumus, haud exiguum esse, quod in multis desideretur. Quò igitur ad *Qua innare possunt.* perfectionis huius apicem contendatur, suppleaturque quidquid vîpiam deesse potest, hæc visa sunt suggerenda, atque ut re ipsâ in usum veniant, sed ilò commendanda.

I Ut singuli dierum aliquot spatio Epistolam B. P. Nostri de Obedientia attentè legant, meditenturque capita, excerptendo, *Aliquot diebus legendæ Epistola B. T. N.* quæ in eâ sanè insignia & plurima occurrent, tum de virtutis huius dignitate ac præstantia, tum de eiusdem necessitate gradibus, & perfectione;

etione; de impedimentis, motiuis, & ceteris. Veniatque in mentem, quod à S. Basilio in reg. breu. interrog. 166. dictum est: cum quæssisset, *Quo animi affectu par illi sit obedire, qui ad mandati executionem sollicitet urgeatve?* Non minore, inquit, quàm quo paruulus vehementer esuriens, vocanti se ad pastum nutrici obtemperat. cum alio in loco Dominus dicat, *Meus cibus est, ut faciam voluntatem eius, qui misit me Patris.*

Ioan. 4. 34.

Opus est animi robore.

2 Hoc persuasum habeant omnes, animi robore, ac virtute opus esse, ut ipsi nos vincamus in rebus arduis: crebras autem contradictiones, procurationes, ceterosque conatus, qui nonnumquam interponuntur, magnam imperfectionem denotare; proculque ab eâ simplicitate, promptitudine, alacritate, reliquisque conditionibus abesse, quas virtus hæc requirit, & quas Constitutiones nostræ, baculi cadaverisque exemplo, declarant: non quò interdicatur id, quod eadem Constitutio & Epistola permittunt, ut Superiori proponatur, ita nimirum, ut præmissâ oratione, & cum indifferentiâ, quæ ibidem præscribitur, eo denique modo id fiat, ut vetè nihil aliud sit, quàm repræsentare, hoc est, ob oculos Superioris ponere, totam ei causam res expositæ relinquendo, sed quoniam alter ille agendi modus, quem diximus, non est exponere, sed ut quidam extorquere, voluntati suæ obsequi, oculis que cuniculis peragere,

P. 6. c. 1. §. 1.

gere, vt id demum fiat, quod ipse velit.

3 Superiores suauiter ac paternâ imperandi ratione vtentes, liberum & legitimum ad orationem recurrendi tempus subditis concedant: leniant ipsi difficultates, & in circumstantiis aliquibus condescendant. Quod ad rem verò ipsam, fortiter adnitantur, vt subditi se ipsos vincant, fiatque id omnino, quod ad maiorem Dei gloriam, inferiorumque bonum conducit.

4 Si quando vulgares personæ intercedant, quæ priuatâ potius beneuolentiâ, humanèque instinctu moueantur, quàm quòd ad eos hæc cura pertineat; reici à Superioribus debent, suauiterque moneri, ad ipsos non spectare, vt sese in talia ingerant. Quòd si graues sint personæ, vt Consultores, aliæve alicuius nominis Patres, benignè illos audiant: deinde verò si animaduertant leuioris esse momenti, quod proponunt; hortentur, vt obedientiam ipsi potius promoueant, animum iis addendo, pro quibus intercedunt. Vbi autem sæpius repugnando, modum egrederentur, aut interponerentur etiam externi, tum disertè doceant sibi hoc ipso constringi manus, ne assentiri possint.

Intercessionem moderanda.

5 Si subditus (vt fieri nonnumquam solet) duritiem se hac vel illâ ex causâ præbeat, ita vt solam verbi Nolo vocem vitando, rem ipsam prællare videatur; constantes nihilominus,

Quod si duritiem se præbeat.

nus, fixosque manere Superiores oportet, illumque ad orationem & indifferetiam, quam regula iubet, hortari. Admoneant præterea, repugnando diutiusque renitendo, grauitur peccari: nec expectari in Societate præcepta debere, ubi satis esse debeat signum ipsum indicatæ voluntatis. Ut sibi persuadeant se postquam se ipsos vicerint, tantò latiores fore, tum ob quietem conscientie, tum ob fructum ipsum, quem magno cum merito ex victoria capturi sunt.

Non reformidandi recursus.

6 Non reformident immediati Superiores subditi recursum ad mediatos, nec propterea omittant obedientiam urgere: quin hunc potius expectent, quia mediati erit omnia, quæ ipsi egerint, confirmare; subditumque ad obedientiam inducere.

Causa inobedientie inuestiganda.

7 Serio moneantur nostri, ut causas, unde obediendi difficultas nascitur, inuestigent: reperientque non in vnâ solùm obedientiâ peccari; sed quoniam hæc, ut prompta sit, alias etiam virtutes supponit, altius innoxum habere illatum defectum intelligent. Verbi gratia, si quid præcipitur, quod ab existimatione vel honore proprio alienum sit; difficultas obediendi oritur ex superbia. Hic igitur admo- uendum examen, hinc meditationes, & remedia applicanda sunt, considerando, quam inanis res ea sit, præsertim in homine religioso, qui sui contemptum, seque mundo crucifixum esse

esse profiteatur. Si opus aliquod imponitur vel officium, à quo ipsi abhorreamus, ex immortificatâ naturâ promanat; sin contrâ, deferendum est officium, ad quod propensiores eramus; ex eodem ipso inordinato ad officium illud, aut personam affectu proficiscitur. Si terret operis difficultas, fortitudinis est defectus; eodemque modo in similibus. Humiliemur itaque, & ad anteriora virili animo connitentes, gloriosam de nobis ipsis victoriam reportemus.

8 Intelligent Superiores se, cum suorum in hac parte defectus non cohibent, plurimum damni adferre tum subditis ipsis, tum etiam Societati. In illis siquidem minuitur virtus & meritum obedientiæ, minusque in dies apti, & minùs tractabiles efficiuntur; non aliter quàm equis meticuloſis accidere solet, qui nisi stimulis incitentur, grauiùs semper ex omni re concutiuntur, & longiùs retrocedunt. Societati verò difficilius senſim redditur gubernatio, diuini que obsequij cursus magnoperè retardatur. Sublatâ enim ex Societate obediendi promptitudine, cum præcepti, vt dictum est, pœnarumque vsus, eò quòd signum ipsum satis esse debeat, ordinarius non sit; in promptu nimirum est, quis tandem rerum nostrarum status futurus sit, animo prospicere.

9 Intelligent porrò subditi, ex tot eiusmodi contradictionibus, intercessionibus, diffi-

*Superioribus
cohibendi ij
defectus.*

*Unde sit mē-
nis suavis
obediētiæ*

cultatibus futurum, vt & minùs suavis sit obedientia , & Superiores vicissim id præstare nequeant, quod de Præposito Generali agens Beatus Pater Noster 8. par. Constitutionum cap. 1. lit. G. ab illis exigit , vt subditorum scilicet arbitrio aliquid relinquunt, eis compatiantur , & ex parte etiam nonnihil aliquando indulgeant, cùm videretur id posse magis conuenire : quoniam hæc in subditis pariter supponunt obedientiam , vt plurimum, in ceteris rebus promptam, humilem, integram, cæcam, qualem denique ab eo descriptam videmus. Cum iis enim qui sic obedire consueuerunt, potest & debet Superior in nonnullis indulgere , quippe qui hoc tum sine vlllo vel subditi vel gubernationis suæ detrimento facturus sit. Cum iis verò, qui aliter se gerunt, aliter quæ ferè semper affecti sunt , locum non habet illa Beati Patris Nostri admonitio ; quandoquidem id magis, sicut ipse ait, conuenire non potest , nec perpetuò item præstari hoc debet: quoniam id aliud non esset quàm subditorum inobedientiam alere, eorumque infirmitatem confouere. Faciliora autem euadent omnia, si excitetur animus, vt in Superiore Deum agnoscat , nec certâ quadam prudentiæ lege, quâ vnâ ad obediendum duci videmur , eò quòd rē ita fieri debere iudicemus, vsque quaque moueatur; sed illum in iis etiam agnoscat, quæ ab hacce humanâ prudentiâ dissentire & dif-

discrepare quodammodò videantur. Quam ad rem conferre haud dubiè plurimùm possent præcipui nonnulli ex antiquioribus, maiorisque existimationis Patribus, si hanc de se fiduciam Superioribus præberent; ut extraordinaria nonnumquàm in ipsis earum rerum exempla edere possint, quæ humanâ hac prudentiâ niti minimè videantur, & in quibus Deus ipse in Superiore agnoscat. Ideò enim ad ista nos Beatus Pater Noster confirmabat tum doctrinâ, dum eorum ipsum instrueret, ut ipso etiam loquendi modo huius rei nos quodammodò commonefaciat; tum exemplo ubi res tulit, magnæ interdum virtutis Patres vel ipse redarguens, vel publicas illis reprehensiones ac pœnitentias imponi iubens: quod IGNATIVS, ut IGNATIVS, nullâ prorsus ratione committendum censuisset. Ad extremum, ut caput hoc concludam, meminerint Superiores, debere se facem, sicut dictum est, aliis præferre, & exemplo illis præire, quemadmodum à Beato Patre Nostro præscribitur quartâ parte, cap. 10. §. 8. eodemque modo qui primas in Societate tenent, ut est in parte octauâ, capite primo, §. 33.

De castitate.

CAPVT V.

*Qualis So-
cietatis puri-
tas.*

CV M ea, quæ huic virtuti aduersantur, honori diuino, Societatis existimationi, proximorum auxilio tantoperè aduersentur: satis fore videbatur, si in mentem reuocaremus quod in principio sextæ partis à B.P. Nostro dictum est, enitendum nobis esse Angelicam puritatem imitari & corporis & mentis nostræ munditiâ. Sed quia necesse est quibusdam adiumentis & damna præuerrere, quæ suboriri possunt, & bonum Religionis nostræ odorem conseruare, ne vnius cuiuspiam labes in vniuersum corpus redundet; è re etiam futurum visum est, si nonnulla breuiter commo-
neremus.

*Causa hu-
iusmodi la-
psus.*

I Lapsus istos in benè constitutâ religione, qualis per Dei gratiam est Societas, si quando contingant, non posse nisi ex magnâ quadam negligentia, longi-que temporis laxitate proficisci. Quod quidem manifestè constat ex Nouitiis: hi enim, si prauos sæculi habitus intueamur, acriores haud dubiè illos habent, & minùs mortificatos: si virtutem, eius-que firmitatem, minùs solidam minus-que confirmatam: si virtutum exercitia, aut sensuum mortificationem,

nem, multis partibus breuiorem: si noxias rerum species, magis viuudas, & magis impressas: si vsum orationis & communicationis cum Deo, longè difficiliorem. Quare nihil est quod non persuadeat, illos ad lapsum proniores, & magis expositos esse. Et tamen nouo suo feruore, sensuum custodiâ, tentationum manifestatione, occasionumque absentiâ, diuinâ gratiâ iuuante, in magnâ puritate conseruantur. Ex quo intelligere est, ceteros qui diutius in hac scholâ versati sunt, qui que frequentiori orationis, mortificationis, pœnitentiarum, sacramentorum, aliorumque exercitiorum vfu solidiores facti sunt, nisi omnem sui curam abiiicere velint, posse Dei ope nixos, non solum immunes ab omni grauiori labe seruari; sed in dies magis in omni puritate, ac sanctimoniâ proficere.

2 Magna esse ad hunc finem, si rectè illis vti *Præsidia ad puritatem conseruandam.* nouerimus, in Societate præsidia, vt sacramentorum frequentationem, rationem conscientię, quæ Superiori reddenda est, errorum ac defectuum per eos qui extra confessionem illos acceperint, manifestationem; assiduam socij præsentiam, orationem mentalem, duplex examen, frequentem librorum spiritualium lectionem, otij fugam, studiorum laborem, sobrietatem, & pœnitentias; modestiæ, castitatisque in alijs, quibuscum viuimus, exemplum; Superiorum vigilantiam, casuum reseruationem,

nem, tot denique Regulas ad hunc eundem scopum tendentes: vt permirum sit hominem, qui tam multis præsiidiis septus sit, labi, nisi sensim peruertatur, & his omnibus auxiliis se ipse destituat, alia penitus omittendo, alia perfunctoriè & sine fructu vsurpando. Quo certè admoneri ac permoueri quisque debet, vt ad seipsum animæque suæ statum cognitionem referat, memoriâ repetens quod à S. Bernardo dictum est, Neminem repenti fieri turpissimum; & naues submersas complures fuisse, dum in eas aquam sensim defluere sinunt, nec laborant, vt quamprimùm exhaustiur.

Tria Superioribus prouidenda.

Vt subditi spirituales sint.

3 A Superioribus tria sunt diligentissimè prouidenda:

1 Vt subditi spirituales reuerà sint, procedantque cum omni sinceritate, & desiderio perfectionis; atque vt auxiliis, quæ diximus, ritè fructuoseque vtantur. Excubare sedulò in vniuscuiusque curam debent, ita vt simul ac detrimentum aliquod iacturamque, aut remissionem spiritus animaduertunt; maturè succurrant, nec differant, quousque mala crescant & corroborentur.

Occasiones amputanda.

2 Amputent occasiones, quantumuis ægrè laturum subditum sentiant, quasi vel parum ipsi fidatur, vel nota aliqua inuri videatur; quandoquidem qui malis occurrit, & exactâ regularum ordinationumque praxi suos periculis

culis remouet; nullam iustam suspicionis causam præbet, sed cautelâ utitur necessariâ. Et quamuis nullum subesset periculum, (& verò superbus adeò nullus esse debet, vt se omni tempore, atque in omni occasione securum arbitretur; cùm S. Petrus post iteratum sæpius parati ad mortem animi propositum, post tam multa constantiæ promissa, quinimò post animi & fortitudinis suæ experimenta, cùm in tot armatorum conspectu, manum ferro admouere non dubitaret; ad vilis mulierculæ vocem adeò graui fœdoque casu prolapsus sit) attamen vel oblocutionum causas præcidisse permagnum est : atque vt hoc etiam deesset, ipsa nihilominus disciplinæ obseruatio per se laudabilis est, religioni decora atque honorifica, & meriti apud Deum singularis. Dispiciant ergo Superiores, quemadmodum cum proximis tractetur, feminarum visitationes, & proluxa colloquia fortiter, iuxta instructionem, circumcidantur, præsertim, vbi leuitas aliqua iocique cernerentur. Ingridiantur prorsus cum illis socij, semoto quouis respectu, serueturque ad vnguem ordinatio nostra circa Reg. 18. Sacerdotum. Nec prætereundum hoc loco videtur, quod S. Gregorius talia reprehendens, ad Ioannem Subdiaconum scribit de Constantino Monacho. *Cognoui quia ad Monasterium, quod in Piceni Prouinciâ situm est, solus pergere sine aliquo fratre*

Lib. 10. ep.
22.

trum suorum præsumpsit : ex quâ eius actione cognoscimus, quia qui sine teste ambulat, rectè non viuat.

Schedulæ & munuscula caueantur.

Schedulæ & munuscula clanculùm data vel accepta, diligentissimè caueantur: familiaritas tenuiorum & ignobilium feminarum, vt quæ suspicioni ac periculo magis expositæ sunt, procul omnibus modis habeatur. Earum cura & patrociniũ ad temporalia subsidia conquirenda, nec suscipi, nisi magno delectu & cautione, permittatur; nec tractari, sine peculiari cum Superiore communicatione, atque ita dumtaxat, vt nec incommoda inde vlla, nec sinistrae suspensiones nasci possint.

Minus spirituales vt iuuantur.
Instru. pro
coad. tem-
por. §. 3. c. 4.

Erga Coadiutores, qui in villis degunt, seruetur exactè ordinatio. Erga eos, qui minus spirituales sunt, & distractionibus magis obnoxij, peculiare sit studium, ne periculis obii-
ciantur, quia etsi nullam de castitate suâ sinistrae suspensionem præbeant; huiusmodi tamè homines occurrentibus occasionibus, quæ plerumque non desunt, tuti parum sunt: magnaque tum ipsi, tum Religioni fit iniuria, cum velut oceano parua quædam cymba malè tuta exponitur. Tales ergo parum solidi ad speciosa concionum, lectionum, & alia id genus munia non promoueantur, quæ opinionem famamque conciliant, & caros externis illos faciunt. Hinc enim adiguntur sæpenu-
merò Superiores, vt de illis, vel circa locum, vel circa occupationes ea statuant, quæ nec Societati,
nec

nec subditis ipsis expediant. Quòd si tandem accidat, quod hominibus spiritu vacuis euenire sæpè solet, vt aut suâ sponte abeant, aut merito suo dimittantur è Societate; grauius inde fit scandalum, alienanturque quàm plurimi; nec capere possunt, quâ ratione homines, qui tanto cum applausu in eiusmodi rebus occupabantur, talem in statum redigi potuerint, nisi occultæ quædam persecutiones, & graues iniuriæ interuenissent, quæ miseros & afflictos ad extrema consilia impulerint: aut si à Societate ipsâ dimissi fuerint, quòd durissimum censerì non debeat, tam vtile membrum, & de quo Religio ipsa tam illustria magnæ in eo fiducia ac satisfactionis argumenta dabat, illicò amputari.

3 Si quid vsquam accideret, quamuis id leue *Leuia non* sit, quod minùs rectum videatur, non præter- *prætereantur.* mittant officium Superiores, vt commonefician, corrigant, & remedium statim admo- ueant: alioqui deterius paulatim fit malum, & tempore ingrauescit.

Doceantur confessarij, ne ex piâ quadam *Confessarij* opinione, quam habent de nostris, venialia *nostrorum* omnia aut leuia, atque extra periculum esse *monendis.* deducant: sed considerantes, quónam tandem res istæ, quæ parux videntur, euadere, quoque exitu terminari possint, nimis liberas conscientias extimulent, ruinas & præcipitia, in quæ ferri imprudentes possunt, ostendant: hoc

vnum esse, quod dæmon technis suis fraudibusque moliatur. Dent operam, vt pestíferas quasdam & nimis laxas opiniones penitus euellant, hoc, illudve non esse mortale, magni momenti non esse, necessarium non esse, vt distinctè confitendo explicetur. Meminerint denique sic terram paulatim alluuione consumi, & cuiusmodi puritas in Societate requiratur, vt omni curâ inuigilent, & mala præuertant.

*De difficultate in gradibus
acceptandis.*

C A P V T VI.

*Graduum
difficultas.*

HOc vnum est, quod ad Societatis pacem vnionemque conseruandam permagnam inter alia vim habet. Et quamquàm per Pontificum declarationes sublatae fuerint difficultates non paucæ, minimè tamen obscurum est, humanam naturam se ipsam semper quærere; multosque ex eorum etiam numero, quos virtutis disciplinæque in ceteris amantes esse constat, magnas, easque graues, in hac graduum materiâ pugnas ac molestias experiri. Ceterùm sperare in Domini bonitate, vocationisque gratiâ debemus, diuinam
Maie-

Maieſtatem, quæ B.P. Noſtro hanc graduum diſtinctionem, Societati uſque adeò neceſſariam, inſpirauit; obices etiam & impedimenta, quæ incurrunt, magis in dies magiſque ſubmoturam. Sed ad uigilandum nobis eſt, adni- *Seruanda pro gradibus.*
tendumque, ut per exactam ordinationum eò ſpectantium obſeruationem, Conſtitutiones ipſas in uſum perducamus. Quam ad rem facient, quæ ſequuntur.

1 Seruetur accuratè quod ex Decreto V. *Decretum V. Congr.*
Congregationis ad Regulam 15. & 57. Magiſtri Nouitiorum adiectum eſt, ut apertè explicetur iis, qui ingrediuntur, &c.

2 Seruentur Ordinationes hac de re con- *Seruanda qua circa ſtudia præſcripta ſunt.*
ſtitutæ circa genus tempuſque ſtudiorum, uaria examina ſuis temporibus inſtituenda, perſcribendum ad nos iudicium, &c.

3 Ordinationes itidem circa tempus, quo *Qua circa tempus proponendi.*
proponi nobis debent, qui ad coadiutorum gradum promouendi ſunt, ut præfixum ſpatium quàm minimùm prorogetur.

4 Erga eos, qui uirtute ſua parum ſe pro- *Quid cum minus probata uirtutis.*
bant Societati, maturè quod ad illorum ſtudia, & circumſpectè agendum eſt; ita ut aliis occupationibus nonnumquàm interrompantur; tum ut ipſi ex parte animum ab eis abducant, magiſque in ſpiritu proficiant; tum ut hoc modo probentur, oſtendantque quantum in obedientiâ proceſſerint., ac præſertim in hac circa ſtudia, & circa liberam ſui ipſorum diſpo-

dispositionem resignatione; differantur certè, vt sensim perspiciatur quomodò se gerant: nã absolutis postea studiis, si rectè illis successerint, insignesque adeò, quod interdum accidit, doctrinã euaserint; obrepunt indidem tentationes, cùm sibi ob scientiam & talenta quemlibet gradum deberi existimant: ægreque adduci possunt, præsertim post aliquot annorum curricula, vt agnoscant defectum virtutum satisfactionisque in ipsis tantum esse, quantus reuerà est; & hunc vnum promotioni suæ obistere atque officere meritò debere. Ob hanc causam, quando eorum studia differuntur, apertè simul de imperfectionibus suis moneri debent: sic enim aut eos paulatim corrigent, aut causam certè suam Societas æquiores reddet: nec poterunt illi, quod subinde solent, causari se laudabiliter & cum approbatione semper vixisse, eò quòd de suis defectibus moniti numquàm fuerint, nec propter illos mortificati.

*Ut exercendi,
qui ad professionem
muni idonei.*

5 Non alantur in certâ quadam spe assequendæ professionis, qui ob ingenij, aut virtutis, vel vtriusque inopiam ad hunc postea gradum per Constitutiones prouehi non possunt. Multoque minùs in speciosis ac plausibilibus muniis exercendi erunt: ex quibus vbi famam apud imperitos, & eos quibus noti non sunt, aliquam collegerint; hac vulgi postea opinione abuti solent, non modò vt testimonium id oppo-

opponant Societati, verùm etiam vt semetip-
 sos ipsi decipiant, iudicium vulgi amplecten-
 tes, & de se sibi supra quàm res habeat, mira
 persuadentes.

6 Nullo modo ferant Superiores, vt de co- *De gradu*
 adiutorum gradu abiectè quisquam loquatur, *coadiutorum*
 aut sentiat, præcipuè ex professis: sed illos ar- *non abiectè*
 guant, mortificent, & instruant, docentes quo *loquendum.*
 ex spiritu talia procedant: & caritatem, obe-
 dientiam, fructumque proximorum, ea de-
 mum esse, quæ non solum apud Deum meri-
 tum, sed in Religione etiam beneuolentiam
 apud Superiores existimationemque conci-
 lient. Hos esse operarios, qui tamquàm mem-
 bra reuerà vtilia, & tali corpore digna, in So-
 cietate pluris fieri, magisque foueri debeant.

7 Quandoquidem Constitutiones ex hoc *Coadiutores*
 Coadiutorum ordine Rectores, vt plurimum, *Patres præ-*
 deligi volunt; peculiari studio in eos intendant *ficiendi Col-*
legiis.
 Prouinciales, quos idoneos ad id munus anim-
 aduertent: quoniam hos in primis, libentius-
 que præ ceteris admitteremus.

8 Quæcumque ad spiritum humilitatem *Humilitas*
 que faciunt, eadem omnia ad graduum etiam *necessaria ad*
 facilitatem conducent: ex huius siquidem de- *gradus.*
 fectu, & humanâ quadam æstimatione, exter-
 nâque in paucis quibusdam specie, omnes hæ
 molestiæ & anxietates promanant.

9 Speramus in posterum ob varias Ordi- *Antiquiores*
 nationes, accuratioremque aliarum Consti- *ut disponen-*
di pro gradu.
 tutionum

tutionum praxim, leuiiores ac pauciores fore difficultates. Præcipuus nunc labor in antiquioribus erit, qui studia peregerunt, & de se ipsis præclarè quidem sentiunt, sed longo intervallo, seu doctrinam, seu talenta spectes, ad eam formam accedunt, quam describunt Cōstitutiones. Verùm & hîc quoque in vocationis gratiâ confidendum est fore, vt difficultates omnes facilè profligentur, si quam possumus, diligētiam adferamus. Quare si repugnabunt, suauiter primùm instruendi sunt, quantâ maturitate, secretis informationibus, multorum prudentium iudicio, accuratisque examinationibus de ipsis actum decretumque in consultationibus fuerit. Inculcanda est promissio, quam Societati pacti sunt, gradum, quicumque designatus foret, acceptandi: quæ quidem, vt aliud nihil esset, tale certè pactum continet cum Societate, cùm subscribit aliquis se legisse, intellexisse, &c. velleque quidquid inibi continetur obseruare, vt sine illo, hoc est, nisi ab eo iniretur, religionis aditu penitus excluderetur. Ex quo liquet eos, qui post huiusmodi pactum, multosque post annos, fidem ac promissa sua non seruant, grauiter omnino peccare, & iniuste agere aduersus Societatem: multoque nunc magis accedente insuper V. Congregationis declaratione, quæ promissionem hanc votum esse declarauit. Et commiseratione sanè dignum est, multisque lacrymis deplorandum,

randum, quòd nonnulli aliquàdo in hoc genere responderunt, se quidem promississe, sed iuxta Constitutiones intellexisse, iuxta quas idonei sibi ad professionem esse videantur. Atquì iudicium hoc nemo est, qui, nisi cæcus planè sit, non videat ad ipsos minimè spectare: sed Religionis arbitrio singula permitti, cuius est de cuiusque talentis iudicare, &c.

Iuuerit eosdè ad exercitia spiritualia cohortari, vt meliùs perspiciant, quam vim habent obligatio & vinculum, quo se Deo obstrinxerunt, vt ei reddant, quod promiserunt. Scandalum illis ob oculos ponere, quod ceteris præbent. Denique monendi in vnoquoque nominatim erimus de personæ circumstantiis, causisq; quas adfert, de eius dispositione, &c.

Ad spiritualia exercitia cohortandi.

10 Conferet ad extremum, si Prouinciales & Consultores de vniuscuiusque promotione, tum priuatim tum publicè, non ex compassione quadam & gratificandi desiderio loquantur, aut censeant; sed iuxta interrogationum responsa, & iuxta formulam Constitutionum, ac Decretorum. Nec complacendi studio præferat quisquam, se in contrariâ sententiâ fuisse; & hunc, illumve altiùs prouehi posse, dotescq; aliorum opinione maiores habere; aut condescendendum, seu indulgendum quidpiam esse: quoniam huiusmodi omnia deliberationes plurimùm labefactant, dissensiones excitant, animorumq; auersiones.

Sincera informationes instituenda.

Sed

Sed satis habeant singuli ex formulâ & Instructi-
one, quod in Domino sentiunt, quâ secreti
curâ decet, ad Præpositum Generalem perscri-
bere. Meminerint hanc graduum distinctio-
nem non in libris solùm extare scriptam debe-
re, sed reipsâ ad Societatem conseruandam,
operariorumque numerum amplificandum
necessariam prorsus esse; B.P. Nostri Spiritus
sancti ductu sic eam instituisse; ideò & re-
tinendum eius vñ esse, & peruincendas, quæ
in diem incidunt, difficultates; cùm per Dei
misericordiam non desint in eo gradu com-
plures, qui non solùm exemplo suo, ac virtute
Societatem ædificant, sed eamdem per mini-
steria, fructumque erga proximos cum magnâ
in Domino laude illam adiuuant & sustentant.
Romæ vltimo Iulij, 1598.

INDEX R E R V M.

Castitas.

Difficultas.

Q VALIS So-
cietatis puritas.
pag. 36
Causa hu-
iusmodi lapsus.

Difficultas ex parte sub-
ditorum. 22

Distractio.

ibid.

In rebus externis occupa-

Præsidia ad eam conser-
uandam. 37

tio. 16

Causa distractionis. 26

Tria prouidenda, ut spi-
rituales sint, & occasiones
amputentur. 38

Executio.

Schedula, & munuscula
cauenda, &c. 40

Executionis defectus. 7.
& 21.

Coadiutores

Executionis vis à quibus
pendet. 7

Vitruuandi. 40

Executioni incumben-
dum. 20

Coadiutores spirituales
Collegiis præficiendi. 45

Exemplum.

De gradu Coadiutorum
non abiectè loquendum. ibid.

Defectus boni exempli.

19

Conferentiæ.

Exercitia spiritualia.

Quæ conferentia habenda.
8

Frequens vsus exercitio-
rum. 25

Confessarij.

rum.

25

Confessarij nostrorum de
quibus monendi. 41

Nostri promouendi ad
exercitia hortandi. 47

D

Ex-

Exhortatio.	Sincera informationes instituenda.	ibid.
Exhortationibus animandi.	Horæ considerationis	
25		
Seria exhortationes de examinanda conscientia.	P erfunctoria obitio.	15
ibid.	Impatientia	
Exhortationes de silentio.	I nperferendo.	18
27		
Generalis.	Indulgentia.	
De quibus monendus.	Nimia indulgentia.	21
9	Remissionis damna.	23
Gradus.	Industria.	
G raduum difficultas.	Industriarum utilitas.	9
42		
Seruanda pro gradibus.	Intercessiones.	
43		
Qua circa tempus proponendi.	Intercessiones moderanda.	31
ibid.		
Quid cum minus probata virtutis.	Non reformidandi recursus.	32
ibid.		
Vt exercendi, ad professionem minus idonei.		
44		
De gradu Coadiutorum non abiecte loquendum.	Lectio spiritualis.	
45		
Coadiutores spirituales perficiendi Collegiis.	E xtraordinarium tempus detur lectioni.	26
ibid.		
Qua humilitas necessaria ad gradus.	Medicina spiritualis.	
45		
Antiquiores ut disponendi pro gradu.	I gnoratio spiritualiter mendendi.	18
ibid.		
Ad exercitia spiritualia hortandi.		
47		
	Obe-	